

AKASHVANI AIZAWL

REGIONAL NEWS BULLETIN

Date – 03/02/2026 Time - 7:30 -7:40 Hrs

HEADLINES (MORNING)

- Transport Minister Pu Vanlalhlana'n tun thla chhunga hman tur Road Safety Month pualin Enforcement Drive leh sawi lawk lova lirthei endik thut te kalpui a ni dawn a ti.
- Agriculture Minister Pu PC Vanlalruata chuan Mizoram sawhthing quality thatna chu khawvelin a hre tan tawh a, chuang chuan lo induh ve deuh an duh tih a sawi.
- Prime Minister Narendra Modia leh US President Donald Trump te chuan ram pahnih sumdawnna lama inremna an siam hnuah US in India thil thawn atanga chhiah a lak a tihniam.
- Vawiinah President Droupadi Murmu-in House pahnih member hma a thusawi chungchanga lawmthu sawina motion chu House pahnihah sawiho chhunzawm a ni ang.

<><><>

ROAD SAFETY-MINISTER MESSAGE

Transport Minister Pu Vanlalhlana'n tun thla chhunga hman tur Road Safety Month pualin Enforcement Drive leh sawi lawk lova lirthei endik thut te kalpui a ni dawn a ti.

Transport Minister Pu Vanlalhlana chuan kumtina hman thin Road Safety Month pual hian tun thla chhung hian Enforcement Drive leh surprise check te neih a ni dawn a ti a, zirlai lirthei la khalh ve tur te, lirtheia eizawng leh NGO pawl hrang hrangte tan Road Safety kaihnawih inhrilhriatna leh inzirtirna tha tak an pek theih a rin thu a sawi a. Minister chuan nikum 2025 khan Mizoramah lirtheia chetsualna tum 73 a thleng a, mi 56-in nunna chan in, mi 45 an hliam a ti a, Mizoram chuan hma a sawn chhoh zel avangin kawngpui pawh a tha chho zel tih sawiin, kawngpui a that poh leh fimkhur lehzu a ngai a ti a, road safety-ah tan lak thar a ngai hle tih sawiin, road safety tih chuan lirthei khalhtute chauh ni lovin, lirtheia chuange, kawngpuia ke a kal (pedestrian) te leh kawngpui hmangtu midang pawh a huam tel vek a ti a, Danin a phut anga lirthei khalh leh khalh loh te, Document felfai, insurance nung leh lirthei a fit tawh em tihte an ennawn fo a tul a ti a.

Minister chuan Road safety chu sorkar laipuiin a ngaipawimawh hle a, kum 2019-ah Motor vehicle Act chu siamtha in dan bawhchhetute hremna khauh tak a siam tih sawiin, Road Safety chu electronic leh smart zawngin a kal chho zel dawn a ti a, Transport department a service an mamawh tam tak chu office a kal kher ngai

lovin online a tihfel tam tak a awm tawh tih sawiin, Road Safety Month chu intuaithar na atana hmang turin mipuite a chah a ni.

Byte: Transport Minister

Fimkhur Hapta Road Safety Month tum li-na hi nimin khan Transport Department Minister Pu Vanlalhlana’n Aizawlah a hawng a, 'Sadak Suraksha-Jeevan Raksha- Fimkhur La I Nun Humhim Rawh ' tih chu thupui atan hman a ni.

Mizoram State Road Safety Council buatsaih Road Safety Month hawnnaah hian nikum khan Mizoram ah lirthei chetsual vawi 73 a thleng mi 56 in nunna an chan thu leh mi 45 in hliam an tawrh thu a tarlan thu leh heng hi a tlangpuiin fimkhur loh vang motor tlan chak avanga thleng tih tarlan a ni.

<><><>

LAWNGTLAI WATER SCARCITY

Lawngtlai West bialtu MLA, Pu C.Ngunlianchuanga'n, nimin khan Lawngtlai khawpui chawmtu, Tuilakna a hmunah tlawhin, mipui lamin Tui an hmuhtat theihloh chhan a enfiah.

Pu C.Ngunlianchunga hi Sr.Executive Engineer Pu H.Lalnunthanga leh PHED a thawktute bakah Power & Electricity hotuten dawngsawngin, Chhimtuipui a Tui lakna tangin Treatment Plant thleng MLA hian a tlawh a ni.

Pu C.Ngunlianchunga chuan Lawngtlai khawpuiin Tui lama harsatna an tawk thin chu veitham a tling tih sawiin, hnathawktute chu an dinhmun a zawt a, PHED a Sr.EE Pu H.Lalnunthanga chuan duhthusamin Tui Pump ngaih hun laiin Power Supply, Tui Pump khawl tinung turin Voltage sang an neitheilo chu tun dinhmuna an harsatna ber niin a sawi a, Power Voltage san laiin Tuidahkhawlana an neih tamtawh loh vangin duh chen chen Tui Pump ngawt theih a nilo tih sawiin, Lawngtlai khawpuiin nitin Tui Litres Nuai 14 vel an mamawh thin chu, Tui awm mahse, dahkhawlana an neihthat loh vangin harsatna an tawk niin a sawi.

Pu C.Ngunlianchunga chuan Tui dahkhawlana lian leh tha mamawhna a sang hle tih sawiin, theihtawp chhuah tlan tul a tih thu leh thuneitute pawn Lawngtlai mipui harsatna hriatpuiin, hmala se a duh thu a sawi.

<><><>

GINGER

Agriculture & Farmers Welfare Minister Pu PC Vanlalruata chuan Mizoram sawhthing quality thatna chu khawvelin a hre tan tawh a, chuvang chuan lo induh ve deuh an duh tih a sawi.

Nimin khan Aizawla ZPM Gen Hqr Office ah thusawiin Pu Vanlalruata chuan nikumah sawhthing rate a chhiat viau avangin support price cheng 50 in an lei a, kuminah pawh Support Price Mode-in an kal dawn a, sawthing chingtute pawhin Marketing Board-in ruahmanna an siam lo zawm se, Kg-ah Rs. 50 an inpteah a lut dawn a ni, a ti.

Hetihlai hian Sorkarin nimin atang khan loneitute Sawhthing lei a tum thu a lo puan tawh angin bawhzui a ni a, nimin khan hriat theih chinah khawi District-ah mah sawhthing hralh a ni lo a, hei hi Reserve Price a tihsan lutuk vang ni a sawi a ni.

Sorkar ruahman dan chuan nimin atang khan Mizoram puma sawhthing lei tan tur a ni a, district hrang hranga a buaipitu District Agriculture Marketing Committee (DAMC) ten Primary Collection Centre (PCC) leh Secondary Collection Centre (SCC) kaltlangin lei tum a ni a, hetihlai hian Mizoram sorkarin sawhthing hralh chhuah phalna man a bituk, Reserve Price chu cheng 40 atanga 45 inkar a ni a, Reserve Price hi a san em avangin a leitu an awm mai lova ni.

Nimin khan Mizoram district hrang hrangah sawhthing hralh a ni lova, Serchhip District-ah chuan cheng 44 a tender tihchhuah niin, chhangtu an la awm loh avangin Sawhthing lak a la ni lova, Khawzawl District leh Vairengteah chuan Secondary Collection Center (SCC) ah sawhthing lakkhawm tan a ni lo a, Tender notice pawh chhuah a la ni lova, Saitual District leh Hnahthial District ah pawh SCC kaltlang a hralh an la awm lova, Champhai District-ah pawh Sawhthing leitu tur chu SCC ten an la zawng kual mek chauh tih Champhai DC, DAMC chairman ni baw, Pu Mohammad Aaqib chuan a sawi a, Aizawl Addl. Deputy Commissioner, Pu Zoramsiama Hmar pawhin Aizawl District chhungah a leitu an la awm lova, sawhthing cho lawk an awm lo baw tih Akashvani News Aizawl a hrilh a ni.

Hemi chungchanga Akashvani News zawhna chhangin MAMB Co-Chairman Dr KC Lalmalsawmzauva chuan Reserve Rate an siam chhin hi Mandi pahni-Mizoroma sawhthing thlen thlakna, West Bengal-a Siligur Mandi leh Asia rama sawhthing mandi lian ber- Azadpur Mandi, Delhi-a sawhthing rate te tinzawn a siam a ni a ti a, vawiin hian Siligur Mandi sawhthing rate chu kg 1-ah cheng 58 a ni a, Azadpur Mandi-ah sawhthing kg 1 chu cheng 55 man vel baw a nih baw avangin Mizoroma Reserve Price pawh hi a san phah tih a sawi a, ruahman lawk ang chuan Reserve Price hi chawlhkar khat zel kalpui tum a ni a, thil thlen dan chu an thlir reng a, a boruak a zirin a tul angin hma an la zel dawn tih a sawi a ni.

MAMB Co-Chairman Dr KC Lalmalsawmzauva

Hetihlai hian mimal sumdawng state dang a thawnehhuak thin te chuan Mizoram khaw thenkhatah Mizoram sorkar kaltlang ni lo, direct-in sawhthing chu kg 1-ah cheng 27 atanga cheng 30 inkarin an lei ve mek baw a, tun dinhmunah Mizoram thenawm Guwahati leh Bagha sawhthing rate chu kg 1-ah cheng 35 atanga cheng 37 vel a nih baw avangin hemi chungchang hrechiantute chuan hmarchhak state dang a sawhthing market rate a san loh laia Mizoram Reserve Price tihsan reng a nih chuan Mizoroma loneitute tharchhuah sawhthing chu an ti ral thei lovang tih hlauhthawnawm an tih thu an sawi a ni.

Mizoram Agricultural Marketing Board (MAMB)-in a chhinchhiah danin, kumin hian Mizoram pumah sawhthing hralh tura chhinchhiah quintal nuai 3, sing 4, sang 5, 495.82 a awm a ni.

Hetihlai hian Agriculture Minister Pu PC Vanlalruata hian Kum 2026-27 Budget-ah thlai thar leina tur an dah dawn a ti a, nikumah khan ZPM sawrkarin Handholding-a an dah ring nghal in thlai thar leina budget-ah a dah a, mahse, House-ah thlai thar leina tur an dah chu an zawt si a chuvangin Chief Minister thu in a hranpain, Handholding-a dah loin, an dah tawh dawn a ti.

Vairengtea kan corr sawi danin, Sawrkar in sawhthing lei tan anih tur thu a puan hnuah Vairengte chhunga kuthnathawk tu abikin sawhthing leh hmunphiah ching tu te chuan hralh anih huna phurh chhuah na tur chungchanga an harsat na

tawh te sawrkar hnenah thlenin nimin khan ZPM Serlui North Block hruaitute hmalaknaa huan kawng laih a ni.

Kan corr report lo ngaithla ang.
VC

Vairengte Sabual mual Zâu a Pu Ramsiama leilet peng kawng chu huan neituten an thlai leh hmunphiah te hralh tura an phurh chhuah duh tawh mahse leimin leh khuar avangin lirtheia tlawhpawh hleih theih lohvin a awm a, an harsatna tawh hi ZPM Serlui North Block hruaitute hnenah thlenin hmalakpui turin an ngen a, Block hruaitute chuan an harsatna tawh te a hmunah hmuhpuiin, he kawng Kilometer 1 vela thui chu lirthei - kal theihna turin JCB - hmanga khuar hnawh leh nawr niin, an sial thar sak an ni.

He lai huamchhunga huan nei te leh kuthnathawktu te chuan kawng tha taka laih anih tawh avanga an thlai tharte phurh chhuahna kawngah harsat na an neih dawn tawh loh thu an sawi a, an phur tawh hle tih an sawi.

<><><>

LAWNGTLAI TB

Lawngtlai Bawrhsap ' Lawngtlai District TB Forum' Chawirman nibawk Pu Donny Lalruatsanga kaihhruaia TB Forum meeting nimina neihah Lawngtlai District- ah TB awmlohna khua a la awm lo a tih tarlan a ni.

Meetingah hian nikum chhunga TB umbo hna thawhna kawnga an hmalakna te tarlan a ni a, TB rinhlelh test - 1037 awmin, TB vei mi - 77 an awm a ni. Thla 13 kal chhung khan TB vei tihdam - 117 awmin, thi- 2 an awm thu tarlan a ni bawk.

Pu Donny Lalruatsanga chuan TB umbo turin Department pakhat chauh a tawh lo tiin, department zawng zawng, NGO,Kohhran leh mipuite nen thawhho thiam a pawimawh tak zet a ti a. Sawrkarin TB umbo turin National TB Elimination Programme (NTEP) kalpuiin TB Forum hial din a ni a, sawrkar hmalaknaah thahnem ngai taka thawh zel a tul hle a ni, a ti. Bawrhsap chuan District dangte nen tehkhinin, hmalakna tur a tam hle tih tarlangin, TB umbo kawngah tan lak thar a nih tur thu a sawia.

Inkalpawhna lama harsatna awm lo turin, TB umbo tura thingtlang lam atanga hmalak tan niin, khawpui lamah chhunzawm zel a ni ang a ti. Bawrhsap chuan khawvelin 2030 ah TB umbo a tum tih tarlangin, Lawngtlai District - ah pawh umbo a nih ngei theih nan theihtawp chhuahpui turin sawrkar department, NGO, Kohhran leh Lawngtlai mipuite a sawm nghal bawk.

<><><>

WORLD WETLANDS DAY

Saitualah World Wetlands Day, 2026 chu nimin khan Saitualah hman a ni a, Conservator of Forest Pu Lalnunsanga Khawlhiring chuan a hmanpui.

Khuallian chuan kalkhawmte hnenah lawmthu sawiin wetland pawimawhzia a sawi a, ramsa awmna hmun a nih angin wetland-te kan humhalh that chuan ramsa leh nungchangte mai bakah mihringte tan hlei hlei leh boruak tha a awm phah dawn a ni, a ti. DFP chuan kumin thupui pawh, "Wetlands and Traditional Knowledge: Celebrating Cultural Heritage" chu thlan a nih thu sawiin tui hna humhalh, enkawl leh venhim kawnga tan lak a tul ziate, hnam tihdan phung leh khawtlang nunphung, science thiamna nen inpawlha hma lak zui a tul zia a tarlang bawk.

He hun hi Honorary Wildlife Warden Dr. Lalsiamhnuna chuan kaihhruaiin World Wetlands Day, 2026 puala Essay, Slogan, Painting, Reels insiamsak lawmman chu a sem nghal a ni bawk.

(Rammawizuala Lawngtlai PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INDIA-=US TRADE

Prime Minister Narendra Modia leh US President Donald Trump te chuan ram pahnih sumdawnna lama inremna an siam hnuah US in India thil thawn atanga chhiah a lak a tihniam. PM Modia'n Social Media lama a tarlan danin US chuan India thil siam US a thawnluhnaa chhiah tariff a lak thin chu zaa 18 ah a ti hniam a. Pu Modia chuan eibar zawwna kawngah leh mipui rorelna ram lian pahnih ten thawhdun an rel chuan thil tha tam tak a lo chhuak thin a ti a. President Trump-a rorelna chu khawvel remna leh muanna atan a pawimawh tih sawiin India chuan a thlawp tlat a ni a ti bawk.

India leh US ten inremna thar an nei thei chu External Affairs Minister Dr. S. Jaishankar chuan lawmawm a tih thu a sawi a. Social Media lamah he thu hi tarlangin Pu Jaishankara chuan he inremna hian hna thar a siam ang a, ram thanna a thlen dawn bakah ram pahnih eibar zawwna kawngah ngaihtuahna thar tha zawk a thlen ang a ti.

Union COMmerce and Industry Minister Piyush Goyal pawhin PM Modia leh President Trump ten inremna an siam thei chu lawm awm a tih thu a sawi a. Ram pahnih ten ngaihdan inang leh an hlawkna tura dik taka an thawhdun zia a tilang a ni a ti.

<><><>

SESSIONI

Vawiinah President Droupadi Murmu-in House pahnih member hma a thusawi chungchanga lawmthu sawina motion chu House pahnihah sawiho chhunzawm a ni ang. Nimin khan Lok Sabha-ah chuan Motion puluttu Union Minister leh BJP hruaitu Sarbananda Sonowal chuan President thusawi chu chhinchhiahtlak atih thu a sawi a. Ram hma hun thlirlawkna ropui tak President thusawiah khan a awm thu a sawi a. Sawrkarin mitin tana rorelna dik pekte, hmasawnna huapzo leh Viksit Bharat dinna turte a tel a ti.

Union Parliamentary Affairs Minister Kiren Rijiju chuan President thusawia motion of thanks sawiho nan hian Lok Sabha ah darkar 18 bituk anih thu a sawi a.Vawiina chanchinbumite a kawmnaah Pu Rijiju chuan ni thum chhung an sawiho hnuah Prime Minister Modian nilaini khian sawihonaa zawhna awmte chhangin a khar ang a ti.

<><><>